

## Premi svizzer da musica per «Ils Fränzlis da Tschlin»

■ (rtr) **Grond'onur per Ils Fränzlis da Tschlin, els vegnan undrads cun il Premi svizzer da la musica. Ensemen cun 13 ulteriurs premiads pon els prender encunter il settember quest impurtant premi da l'Uffizi federal da cultura.** Il premi principal «Grand Prix Musik 2019» va al duo «Cod.Act» da Le Locle.

Mintg'onn onurescha l'Uffizi federal da cultura 14 persunalitads u furmazions da musica cun il Premi svizzer da la musica. Els premis, dotads cun 25 000 francs, han l'intent d'undrar e reconuscher las prestaziuns musicalas extraordinarias ed innovativas. La novitad ch'els vegnian premiads cun in tal premi ha fatg surstar ed ha commuventà Ils Fränzlis, uschia *Domenic Janett*. Els n'hajan betg fatg quint cun ina tala undrientscha ed hajan uschia tant pli plaschair da quella reconuschientscha federala.

Cun strusch quarant'onns è la furmaziun anc relativ giuvna. E tuttina è gia la terza generaziun dals Janetts activa. *Madlaina, Cristina* ed *Anna Staschia*, las figlias da *Curdin* e *Domenic Janett* – els tschintg furman Ils Fränzlis

dad oz. Dapi il 2014 surdat l'Uffizi federal da cultura in premi per la scena da musica svizra. Cun il «Grand prix Musik» ed ils 14 premis da musica vulan ins undrar interprets e furmazions sur tut las spartas da musica. En il focus per la surdada 2019 è stada la musica electronica, interpretada e cumponida en differents furmas.

Il premi principal, dotà cun 100 000 francs, va quest onn als dus frars *André* e *Michael Décosterd* da Le Locle. Sco duo Cod.Act sa movan els en il sector d'art da tun. Els creschan produzioni da musica en moda electronic-acustica en cumbinaziun cun projecziuns da figuras e furmas digitalas. Els preschantan lur art a festivals sin l'entir mund ed han gia pudì retschaiver numerus premis per lur lavur.

Ils ulteriurs Premis svizzers da la musica van a *Bonaventure – Soraya Lutangu*, *D'incise – Laurent Peter*, *Pierre Favre*, *Béatrice Graf*, *Michael Jarrell*, *Kammerorchester Basel*, *KT Gorique*, *Les Reines Prochaines*, *Rudolf Lutz*, *Björn Meyer*, *Andy Scherrer*, *Sebb Bash* e *Marco Zappa*.



**Ils Fränzlis da Tschlin cun Domenic, Anna Staschia, Cristina, Madlaina e Curdin Janett.**